

## Thunget Galhangte



### SABBATH NITAAK

**Tu Kaalsung Simding:** *Dan. 2:20–23; Dan. 6:10, 11; Sawl. 20:36; Pian. 5:22–24; Pai. 33:15–23; Pai. 32:31, 32.*

**Kamngah:** “Keimah in TOPA ka it hi. Banghanghiam cihleh amah in ka aw le ka thum’nate a hong za hi. Banghang hiam cihleh amah in kei lamah a bil hong ngat hi. Tua ahih manin ka nuntak hun sung teng ama tungah ka kiko ding hi.” (*Late 116:1, 2, ZSV*)

**N**a lawm hoihpeh ahi-a, nazi/pasal tawh tam kiho khollo dingin kingaihsun in. A sawtlo in na kikhawlhna uh kitatsat ding a, buaina peuh omthei ding hi. Pasion tawh kikhawlhna ah zong thungetna in mun thupi khat panin mapang hi. Ki-aapna ngeina khat hi-a, mimalsim hong thahatsak dingin i kikap khat zong ahi hi. Thu ngen lopi khawngin sawtveipi i omkhak leh Topa kiangpan gammang ding hihang.

Lai Siangtho sungah, thungetdan tuamtuam tawh thungen mimal tampi om hi. Tuate in Pasion tawh kikhawl uh ahih manun, Pasion le amau’ kikhawlhna, amaute’ thungetna, tua amaute’ thungetna in zong midangte nundan kikheelna piangsak dingin huzaap nei cih nunglehet leng kimu hi. Eima’ thungetna in zong eimah bek hilo, midangte zong huzaap thei hi.

Lai Siangtho simna mahbangin, hih thungetna thulu zong lian in thupi a, kaalnih sung bekin muhzawh zah sangin zaizaw tham hi. Tu kaal sungteng in, Lai Siangtho sunga thungen mite le thungetna pen Pasion tawh kikhawlhna ah thubulpi ahihna sin ding hihang. Amau’ hong lamlahna panin thu kisin ni.

\*May 9, Sabbath ading kiginkholhna in tukaal lesson sim in.

## A Citak Daniel

Daniel zong Lai Siangtho sungah galhang khat ahi hi. Ama' tang thu masa Daniel 1 sungah, "Daniel in kumpi inn sunga an le lenggah zu tawh a pumpi a thaanghuai sakloh nadingin a lungsim a khensat hi" (*Daniel 1:8*). Daniel le alawm thumte tungah zong "Pasian in, lai theihiamna le pilna apia hi. Daniel pen mangmuhna le mangkhiat siam na apia hi" (*Daniel 1:17*).

Lai Siangtho in Daniel pen pil hi (*Dan. 1:20; 2:14, 21, 23, 48*) ci-a, Pasian Kha Siangtho in ama' sungah om (*Dan. 4:9, 18; Dan. 5:14; Dan. 6:3*) a, vantung in amah it mahmah hi (*Dan. 9:23, Dan. 10:11*). Hiteng pen, Pasian tawh kizopna khauh anei mipa khat a kipulaakna ahi hi.

Daniel 2 sunga, Kumpipa Nebuchadnezzar in, Babylon mipil khempeuh sihdan a piak ciangin, Daniel in tua ipcip mang a dingin Pasian' hehpihna zong hi (*Dan. 2:18*). Pasian in kumpipa ' mang Daniel kiangah a pulaak phet leh, amah'n thakhat in thungen pah hi.

**Simin, Daniel 2:20–23. Banghang in Daniel thungen a, hih thunget na pan bang pilna kingah thei hiam?**

---

Hunte bei in kumpite kahto in pukkik uh a, Daniel ahihleh kumpi te tungah ngaih- sutna piapa in kip paisuak a, "a lungsim pil mahmah ahih manin; kumpipa in zong gam buppi tungah koih dingin ngaihsun hi" (*Daniel 6:3*). "Daniel thuman citak in, mawhna le khialhna khat peuhpeuh ama' sungah kimulo hi" (*Daniel 6:4*). A naseppihte in hazatna tawh thaang siah zel hinapi (*Daniel 6:5-9*), Daniel in ama' thungetna mahtawh lauhetlo in om hithiat lel hi.

**Simin, Daniel 6:10, 11. Hiteng ah Daniel' thu bang gen hiam?**

---

Haksatna a thuak ciangin Daniel thungen hi. Lauhuaina in ama' nuntakna lauh-thawn hinapi, amah ahihleh (Jerusalem lamnga in tawlet hongin nikhat thumvei thungen den in) om hithiat hi. Ama' thungetna sungah thatang kipiakna in khukdin a, lungdamna le hehpih na zonna bulphuh hi.

**Hibang thute i et ciangin, thunget theihlohna dingin nangma' kamzonna maimai te in bangzah khebai bang hithei naci hiam?**

## Thunget *laitak* Pumpi Omdan

Thusia khatpeuh na tuahkhak ciangin, lawm ngaihpen khat samin kikuppih thei hihang. Thuhoih omleh zong, hawpsawn ding mikhat zong hihang. Pasion zong tua mah bangun kihih thei hi. “Thungetna in Pasion pen lawmkhat bangun lungsim hong in pulaak na ahi hi”—Ellen G. White, *Steps to Christ*, p. 93.

Thungetna pen Pasion tawh hong kizomsak banah dawimangpa kiangah ei kua aa' cih pulaak hi. Khukdin in thu i nget ciangin, tuni in Pasion teel zaw ihihna khuamial ukte kiangah tangkona ahi hi. Tua bekthamlo i thunget ciangin Pasion in vanmite sawl in i kiimle paam ah munlasak in, galte khutsung panin hong kembit hi (*Late 91*).

Taksa mahmah tawh *khukdinna* in kiniamkhiatna lahna hi. Tokhom tungah tut *laitak*, lupna tungah lup *laitak* in zong thu kingen thei veve hi. Pasion' maiah i kuun ciang un, i lungsim ki-aap zawdeuh a; i taksa mahmah in Pasion lianpen a, eite pen Ama' piansak sate hilel cih pawkna ahi hi.

**Anuai-a** Lai Siangtho munteng sim inla mimal thungetna ah a khukdinte' nuntakna lungngai kik in: *Dan. 6:10; Luka 22:41; Sawl. 7:60; 9:40; 20:36.*

Din'sa in thungen zong Lai Siangtho hun in omveve hi (*2 Khang. 20:5, 6, 13; 1 Sam. 1:26; Job 30:20; Luka 18:11*). Tut'sa in thungen zong Lai Siangtho in ciamteh veve hi (*2 Sam. 7:18; 2 Kumpi. 4:38*).

Pawlkhat leuleu in bawkkhupsa in a maitang leingat uh hi. Hihbang in thungen tamlua khollo a hihhang; vanglianpen pa' maiah ki-aap thungetna hipa diak hi (*1 Kumpi 1:47; Mark 14:15*).

Na thunget ciangin koibangin na om zel hiam? Lai Siangtho in omdan hibang cih hong kal selo ahilhang; omdan pen thupi veve a, zahtak piakna, sunglam ngaihdan le Pasion tungah ki-aap nopna lungsim lahkhiatna ahi hi.

Pawlkhatte khukdin theilo uhhi. Ahilhang a thupi penpen in lungsim ahi hi. Khuk din thei gige napi banghang khukdin lo sese, Pasion tawh na hunzat bangzah hong huzaap hiam namuh theihna dingin mailam ah khukdin kisin loding maw?

**Lai Siangtho in “thungen niloh ding”** (*1Thess. 5:17*), **thungen un** (*Col. 4:2*), **le thungen tawtung un** (*Rom. 12:12*). **Tuni, nading a, natu a, nalum a, lam napai zongin na ngaihsutna teng Pasion kiang hei inla, Amah lawmhoih in nei in. Tu mahmah in kipan in.**

## Enoch Lampai in Kiho

**Simin, Piansil 5:22–24. Enoch’ tangthu banghong telciansak hiam?**

Lai Siangtho in Enoch nundan tam gen hetlo ahiihang, kum 300 sung Pasion tawh tonkhawm in Pasion in van ah lato cih. Mi khat in Pasion tungah aki-aapna in, ama’ nundan mah hipah cihna thuhoih mahmah ahi hi.

Ciapteh ding thu khat panin, Enoch in “lungduai in thungen tawntung” (Rom. 12:12) ding a, lungkialo in upna hangin Pasion tawh kinai takin khangto ding hi. Ama’ nuntak hunlai in leitung in gitlohna sungah khangto mahmah hinapi, Enoch ahiihle, Pasion’ nasepna bek tawh manlah den a, tua zong Amah sungah omkeileh hitheilo ding hi.

“Thatang nasepna kawmkal ah, Enoch in Pasion tawh kikhawlhna ah kipkho mah mah hi. A nasep liansem hansem leh, a thungetna sung ah kipkho semsem hi. Mi lakah tawmveino sung hong om in, nasepna tawh mite limlah thuhilh in, ama’ aituam in hunla leuleu in Pasion bek in a piaktheih vantung pilna pen anduh tuiduh bangin zong hi. Pasion tawh kikhawl in, Enoch in Pasion’ limmel suun semsem hi”—Ellen G. White, *Patriarchs and Prophets*, pp. 86, 87.

Leitung tawh kikhenkhia in yathih yahan te bangin tuam om ding zong Pasion in deih tuanlo hi. Enoch bangin, vanzuak vanlei lel in kimlehpam te kisapna zong donthei lel ihiihang, tua zong Pasion tawh kikhawlhna, Ama’ sungah omna tawh a lamdang Ama’ nundan hong neisak thei bek hi.

Banghun bangmun peuhah thungen thei hihang. Hih leitung ah Pasion hong zak theihlohna mun omlo hi (*Late 139:7-12*); Koikoi ah om taleng lungsim sungah i khanate za hi (*Kahla 3:55-57*). Tua hi a, lungsim sungah thungetna a om mahbang in a gingkhia in thungetna zong a om ding mah ahi hi.

Gamdai takin thunget ciangin, i lungsim buai in ngaihsutna zong kizom diudeu theilo ahiih manin, mungtup khat neih ding pen a haksatna ciangkhat om hi. A gingkhia ahi a, aw ngeina tawh ahi zongin, Pasion om takpi a, thungetna khempueh za in Amah tawh ki tuamhona kineithei cih phawk tawntung ding hihang.

**Na tuni hunte nazat ding ciangin, koitengah leh koibang in Zeisu tawh kiho in thungen ding na hiam?**

## Moses, Pasion Teelkhiat Makaipa

Enoch in Pasion tawh kinaikhawlh mahmah citateu zongin, Pasion le Moses' kikhawlhna kitam muhzaw a, a kihona uh bang kitam ciapteh mahmah zaw hi. Hih a kiniamkhiat mahmah makaipa Moses khualzinna zuisuk zuito leng, Pasion' teeltuampa ahih mahbangin a gualzawhna thusim pen, a hunhun in Pasion tawh kiho simna tawh a kikhawlh tawntungna kimu thei hi.

### **Simin, Paikhiatna 33:15–23. Moses le Topa koibangin kiho a bang teng kiho uh hiam?**

Pasion tawh kihokha in Ama' aw kitel takin za ding bangin kingaihsun in. Israel mite in Pasion tawh tuabang in kiho ding lampi zonglo zaw in, Moses tungtawn in kiho zawk ding thuum zaw uhi (*Pai. 20:18-21*). A tuading mahin lah Pasion in Moses pen tua mual tung mah ah sawlbawk sung meikuang lakpan in hopih in kisakhol sak khinzo hi. Moses' mimal thungetna tampi a kisimkhak teihang, a tamzaw peuhmah pen; ama' makaih ahi a mipite adingin makaihna le mawhna ading lailut sakna tawh Pasion' mai-ah ding kinken ahina zong muh gige ahi hi.

### **Thupiang nih hangin, Moses in innkuante adingin kikham sak hi. Ama' lailut sak lai in innkuante un koibang dinmun ah tunguh a, tua bangin lei dawhsak kei zenleh bangthu piang thei ding hiam?**

- **Aaron** : *Pai. 32:1–14, 31–34; Thlkna. 9:20*
- **Miriam** : *Gam. 12:13*

Miriam tawh a thupiang uh ah a lamdang mahmah thu in; Moses mahmah pen Miriam' simmawhna le hazatna a thuakngiatpa ahi hi. Amah a nungram ah ding hithiat lel henla, Pasion in Miriam leh Aaron tungah amau tawh akituak in gaamsak lelleh hithei lel hi. Ahihang Moses in manlang takin a mawhna maisak zaw in Miriam' cidamna ding in lailutsak hi. Moses' gamtatna sungah, Pasion in mawhneite a dingin mawhmai na'ng hehpihna lianpi hong neihna hong kilangsak hi.

**Matt. 5:44 le Colosse 3:13 simin. Hitakah hong sawl thute na koici hih thei ding hiam? Na hihna in banghang in thupi ding hia?**

## Moses in Minam khat ading Kikham

**Simin, Paikhiatna 32:31, 32. Moses le thungetna koibang in hong hilh hiam?**

Moses in hangsan takin Pasion' mite adingin lailutsak zelzel hi. Mipite a dangtak uh ciangun Moses in (*Pai. 15:25; 17:2-6*), mipite a gilkiat ciangun (*Gam. 11:21, 22*) lunggulhluatna aneih uh ciangun (*Gam. 11:11-15*) Pasion kiang lutsak hi.

Pasion tawh thuciamna bawlkhin phetlian in, Israel in kham-bawngno lim hong bawl uh ciangun, Moses in thu-nung khat pulaak kik in, "Note' tungah Topa' hehna leh a lungkim hetlohna note susia dingin a kithawina hangin kalua hi. Ahihhang in tuahun in zong Topa in kathu hong ngai hi" (*Thlkna. 9: 19*).

Thukante in Kamciam Gampan hong kilehkik ciangin, Moses in thu-nung khat mah pulaak kikin "Topa in note susia ding ci ahih manin, sun sawmli le zan sawmlii sung Topa' maiah bawkkhup in ka om hi" (*Thlkna. 9:25*) aci hi.

Levi mite pen biakinn sungah nasem dingin aki koihtuam ciangin, Moses mahin tua thu-nung mah pulaak kik in "Amasa a mahbang in, mualtungah sun sawmli leh zan sawmli sung ka om a, Topa in tua hun in zong kathu hong ngai a, Topa in note hong susia nawnlo hi" (*Thlkna. 10:10*) cih. Pasion in Moses' thuumna za hi.

Moses' nundan panin thungetna tawh Pasion kiplet ding dan i kisinkha uhhi.

- **Moses in itna thuk tawh Pasion it in, Ama' omzia lim pulaak hi.** Pasion ngiatin Moses kiangah a kipulaakna *Pai. 34:6*. "Topa, Topa, hehpihna nei in adik Pasion; lungduai in itna kip le thutak tawh a dim" cih.
- **Moses in Kamciam Gam lamah Pasion tawh tonkhopna sungah hangsan citak hi.** Eimah bangin, haksatna a phuut ciangin, ama' nundan makaihna sungah Pasion' vangliatna, ompihna muang ngiat hi (*Pai. 33:13*).
- **Moses in Pasion Ama' thuciamna phawkkik sak a** (*Pai. 32:13*), Ama' mite tungah Ama' kamciamte pulaak phakik (*Thkna. 7:8*) a, a beisa a Pasion makaihnate phawkkik sakzel hi (*Thkna. 8:2*).
- **Moses in ama' thungetna Pasion' dawnna yes ahi-a, no ahi zongin saang hi.** Pasion tawh kinaikhawlh mahmahna in, lungdeih teng liibang hong cingsak pahpahlo a (*Thkna. 3:23-29*), thungen tawntung ding cizaw hi (*Luke 18:1-8*).

**Tu mahmah in nangma' lailut thunget sakna kua in kisampha hiam? Tu mahmah in thunget sakding bangin hong daal hiam?**

**Ngaihsutbeh Ding:** Eite in Pasion itlua mahmah ihih manin thungen ding bek ihi a, eima nunna sung ah nakhempeuh kipaipih zawhloh hang: i lungnopna te in eima vangikte, lungkhamna le nisim kisapna khempeuh tungah kigualzo thei hi. “Nipak in nilam a naingat denpen a pianpih ah mahbang in, eite in zong lam-et hetloh haksatna sungah Pasion kianglam naih in omden ding hihang. Na deihnate, na lung nopnate, na dahnate, na lunghihmawh nate le nalaunate Pasion kiang paipih in. Pasion adingin vangiklo; zong gimbeeklo hi. Na lutang tung ah samzang zong a simkhinpa in a tate deihna zong simkhinzo lel hi. I dahna i pulaakte in hong itna Ama’ lungtang lawng hi. Nang hong patausak na khat peuhmah Ama’ kiangah tun in. Leitung zong domto a, vannuai bup ukpipa a dingin, Ama’ puak ding a lianlua omlo hi. Eite’ daihna dingin kul akisam peuhmah Ama’ phawk zawhloh omlo hi. Ama’ simtheihloh dingin amialua eima’ phutkhak thute lakah omlo hi. Ei patauhna te zong Ama’ daihsak zawhloh omlo hi. A neu pen atate tungah bang gimna lauhuaaina peuhma tung theilo, bang lungkham na in amau khalau saklo hi. Lungdam awte, lungsimtak tawh mukphun thunget nate zong vantung i Pa in a zakloh omlo hi. Donpah selo in a koihdak zong omlo hi. Pasion leh kha khat sim in a kikhawlhna uh pen; Leitung ah Ama’ kepcin ding kha dang omlo bang, A ita a Tapa a piak ding kha dang omlo bangliang in kician takin kikhawlhpih hi”—Ellen G. White, *Steps to Christ*, pp. 99, 100.

### **Kikupding Dotnate:**

- ❶ **Thungetna pen hoih na hia, vangik lel ci na hiam? Nangma muhna koi bangin hawmsawn ding nahiam?**
- ❷ **Atunga thute sungah khatna nei mahmah thupuakte om hi. Koipen in nang’ ngaihsutna hong thawn pen hiam?**
- ❸ **Tu kaal sungteng ikisin mithum (Daniel, Enoch, le Moses) cih teng lakpan kua thunget nundan in nang a tawh kinaipen nasa hiam?**

**Tomkaihna:** Lai Siangtho sunga thungen pite thu i sim ciangin, Pasion tawh hi’zah in nai’tak a kizopna omthei kenteh, ahihkeileh kamciam te bangin daai takin a ki-om theih loh na ngaihsun in. Ahizongin eite in i hih zo hi. Daniel bangin, eite langpan’na lak ah nisim in khukdin in dikna le cihtakna i nei thei hi. Enoch bangin, Pasion in semding a hong sap nasep i sep ma’-in, Pasion lamah nga-in, Amah tawh kalsuan khawm dingin i teel ding hi. Moses bangin, eite’ makai le lawm ahi vanglianpa’ liim nuai-ah om ding i teel ciangin, i innkuan pihte le i ta’naute adingin in kikkaam in sepana tawh eite huzaap nuai ah a omte i makaih thei hi.

## Shuka pen Pheituam tawh Kheel

Kenya gam a Maasai tapa Rompas kiangah pastor pa in Seventh-day Adventist-te pen dawi bia-te ahi uh hi, ci-in a gen hi. Saturday ni-in Adventist-te biakinn sungah nunglam ngat-in lut uh a, puan bangmah silh loin biakpiakna nei uh hi, ci-in a gen beh hi.

Ama kum 16 a phak ciangin, pastorpa in thuman a gen takpi hiam cih kan dingin Rompas in khensat hi. Saturday zingsang lamin, a khua panin a tai in a kigamlatna a om Adventist biakinn khat ah khe-in pai hi. Biakinn gampalak lakah kisel-in a en hi. Sawt loin, a masa pen mi hong tung hi. Tua pa nunglam ngatin pai lo a, amah guaktang zong hilo hi. Rompas in tua pa puan hoih mahmah le necktie hoih tak a silh a muh ciangin lamdang sa mahmah hi. Tua nau pangpa in puan hoih le necktie neih ding lunggulh mahmah hi. Ama pumlang phial a, Maasai ngeina puan (shuka), a san a vom a kigial bek silh hi.

Tua ciangin pastorpa le pawlpi mi dangte hong tung uh hi. Amaute zong biakinn sungah nunglam nga-in lutlo uh a, puan hoih silh uh hi. Tua khit ciangin pawlpi lapawlte lasa pan ta uh hi. "Oh Happy Day" la kammalte Rompas bil sungah hong lut ciangin, amah a ki-iip zo kei hi.

Biakinn zuan-in pai-a, a nunglam tual-ah tu-in lunglut tak-in a ngai hi. Thugen khit ciangin, mikang tangval khat ama kiangah hongpai hi. Amah pen US pan missionary khat ahi a, a muh ngeiloh le a muh nawnloh khat ahi hi. Tua pa in kamletpa huhna tawh kiho uh hi. "Hih na bombi ding," ci-in ip tampi a nei pheituam khat Rompas kiangah pia hi. Rompas lungdam lua hi! Ama'n pheituam khat zong nei ngeilo hi. Ama in tuate silh a, a lenkip nading shuka puanpen a kawnggak dingin balkeek hi.

Inn ah a tun ciangin, a sanggam pasal le numei mi 82-te in Maasai tangvalno in pheituamtual teeng a muh uh ciangin lamdang sa mahmah uh hi. Amaute in amah umciah uh a, "Bang piang hiam?" ci-in dong uh hi.

Rompas in tua zanin a pheituam manpha pen a lupna nuai-ah a koih hi. Kaalkik Sabbath ah biakinn a pai ciang bekin tuate a silh kik hi. Sabbath ni sim in pheituam a ten' pen a khua-a naupangte le numeite' mit la hi. Mi khenkhat in biakinn ah amah zuih kipan hi.

Kha bangzah hiam khit ciangin, Rompas le a nu in ni khatlian in tui kiphumna tawh Zeisu kiangah a lungsim uh pia uh hi. Mi 100 phial a pha innkuan khat sung pan a masa mi nih SDA hong hi khin uh hi. Rompas in a nuntakna sungah a khatvei na dingin suahta kisa hi. Zeisu in a nungzuite kiangah, "Thu man na thei ding uh a, thuman in note suahtakna hong pia ding hi," a ci hi (Johan 8:32). "Thutak in kei hong suahtaksak hi," ci-in thu dotna khat ah Rompas in gen hi. *Mailam kal ciangin Rompas thu simbeh in,*



**Khen I: A Huamin Etna****Thubulphuh:** *Late 116:1, 2***Lungngaih Ding:** *Dan. 2:20–23; Dan. 6:10, 11.*

Pasian in i thungetnate hong ngai, hong dawng ding cih i theih manin thu ngen hi hang (*Late 116:1, 2*). Tua hi-a i thunget te pen Amah kiang a kai kik masa Pasian tung ah i thuk kikna hi. Tua hi-a Pasian pen Piangsakpa, nuntakna a pia Pa hi aci tanglai Israelte' thungetna a khum Late bu sung a biakpiakna pen thupi hilo a hiam (*Late 95:1-6; Late 100:1-3*). I kha tha pen thungetna hangin tha nei suak sak hi. Ellen G White in “thungetna pen kha nun'na hi” ci hi—*Prayer*, p. 12.

Thungetna ii a khatna le ma pan'nate i tel' zawk nadingin thungetna pen thupi hi cih agen Daniel bu sung pan in nih teelkhia hang. Tua nihte pen Daniel' thu genna hi-in alian 2 le 6 sungte ah kimu hi.

Alian 2 sungah Danile le alawm thumte in leitung mailam ding thu a hilh kumpipa' mang thu tel nading thu ngetna hi (*Dan. 2:20-23*). Daniel' thunget behnate pen Pasian in amau thunget a dawn'na tungah lungdam kohna hi.

Alian 6 sung ah bel Persia gam sung ah za lian pen pa Daniel in a nuntakna sukha ding hiphial zongin Pasian tung ah thungen hi (*Dan. 6:10, 11*). Bang thu ngen hiam cih kigelhloh hangin Daniel pen kumpi zum ah ama tung-a kisawm lai mah in thungen hicih gen hi.

**Khen II: Hilhcianna**

**Thu pulaak Thungetna (*Dan. 2:20-23*).** Kiniamkhiat tak-a Pasian phatna pen Daneil bu ah thunget masakna hi. Hih thungetna pen thu om man-a kingen hi. Babylon kumpipa pen mang' nei-a tua mang' in amah ihmu thei saklo hi. Amat mang' a phawk theihloh pen suuk zaw hi. Ama' mipilte in lah a mang' gen limlim leh a khatna gen nung ci uh hi. Nebuchadnezzar Chaldea mite pen zuau bungpi ahihlaham tel pah hi. Kumpipa zong heh mahmah a, Babylon-a mipil kici khempeuh vat maai sawm hi (*Dan. 2:4*), tua lak ah Daniel le a lawm thumte zong kihel hi. Amau bang thu ngen uh hiam cih a kigelh loh hangin Daniel in a lawmte kiang ah “vantung a Pasian kiang hehpihna” ngen sak hi (*Dan. 2:18*). Pasain in zong Daniel tung ah mang' khatna thei sak in a thungetna uh dawng hi (*Dan. 2:19*). Daniel zong vantung a Pasian tung ah lungdam koh thu ngen hi. Ama' thuumna le lungdam koh thungetna ah et ding thu te om hi. Tuate pen:

**A. Tuam diak deuhna.** Daniel le alawmte thunget pen sihna a tuak ding laitak ahah manin a thunget uh pen tuam diak pah hi. Amasa pen ah “Daniel le alawmte’n sihna a tuah loh nading kuamah theih zawhloh “thusim” hi (*Dan. 2:18*). Tua ahah manin Daniel le a lawmte pen thungen den te ahah manun tutung pen a tat ngei dan-a thungen hilo hi. Amau tuah khak thu zui-in amau’ thunget zong lungsim takpi tawh ngetna hi.

**B. Mai kituahna.** Daniel le alawmte’ thunget pen lungdaihna a lung gulh milim biate’ thunget namte hilo hi. Daniel pen na a mu khol thei “vantung a Pasion” tawh (*Dan. 2:18*) kituak nuam hi. Hih Pasion pen a kiseel Pasion hi. Isaiah gen bangdan hi “a taktak in nang le nang a kisel cip Pasion nahi hi” (*Isa. 45:15*). Pasion pen amai seel ahah manin (milim te dan hilo) Daniel in a thungetna kidawng hamtang in the cilo hi. Daniel le alawmte in Ama’ hehpihna kiniamkhiat takin thuum uh hi. Amau thu nget zia pen Zeisu gen gentehna sung-a meigong nu bangin (*Luke 18:1-8*) thuum thunget hi. Tua nu’ kuhkal bangin Daniel le alawmte zong kuhkal uh-a Pasion tawh a kilai Jacob’ thunget phawk uh hi: thupha nong piak keileh kong khak kei ding hi” (*Pian. 32:26*).

**C. Atung anuai nasepdan.** Mihing thungetna in kha pen Pasion lam ah sangkhai’to hi. Hih takah Daniel le alawmte thungetna le Chaldea mite’ mitphial a zangh thungetna kikaal kibatloh napi om pah hi. Chaldea te bel kumpipa kalhna pen hih leitung mah ah thasaal sawm uh hi. Tua huhau in kumpipa’ deihte amau’ bum le ai’ siamnate tawh lungkim sak sawm uh hi. Amau bel pasiante pen “mihingte tawh teeng khawmlo” (*Dan. 2:11*) a cite hi uh-a Pasionpen naih theih ding-a tuatlo uh hi.

Daniel leuleu teh bel vantung a Pasion pen hong kum suk-in mang’ ii “thusimte” gen hi (*Dan. 2:28*). Pasion in i thunget nate adawn’ pen i tak’ man, i thunget pen kicin’ man’ hilo hi. Pasion dawn’na pen ei’ tung ah kingak cip na pen Khazih kipiak khiatna a kawk Levi gan gawh biakna ii deihna bul hi. Hih thu huhau-in Levi gan gawh biakna a tang’tung sak Zeisu in Ama min suang-in Pa kiang thu i nget penhong pan’pih hi.

**D. Lungdam kohna.** Pasion in Daniel’ thuumna dawng ahah manin lungdam koh na pen a thungetna ah hel ding mah hi (*Dan. 2:20-23*). Pasion in Daniel “pilna le thahat’na” pia ahah manin Daniel in Pasion thupha pia hi (*Dan. 2:20*). Daniel hih bang tawh Pasion a belh lam lak hi. A thupi zaw ah Daniel in Pasion hehpihna theih neih hi. Pasion kiang pan i ngah peuhpeuh pen amawkna-a hong kipia hi-a ei’ sepzawhna tawh a kisai’na om peuhmah lo hi (*Dan. 2:30*).

**E. Gen khol hna.** Daniel' thunget Pasion' dawnna in amah le mipil dangte nuntak a huut zong in a thupi zaw pen leitung mite le kumpipa zong hotkhatna a ngah ding kideih sakna hi. Daniel in ama' nuntakna kihuut sakna sang-in a zaizaw thu tung ah Pasion tung ah thupha pia hi. Pasion in thu le late, kumpite kheel in Ama' tawntung Kumpigam phut ding ahih manin Daniel in Pasion tung ah lungdam ko hi (*Dan. 2:44*). Tua bang mah in Khazih thungetna ah zong "Na kumpigam hong piang taken" mah naci hi (*Matt. 6:10*).

**Apil vaang thungetna (*Dan. 6:10, 11*):** Daniel 6 sung-a Daniel' thunget pen thupiangte hang hilo-in a dangte' hang hi. Kumpipa lo buang kua mah tung ah thugen lo ding in kikham zongin Daniel in a thunget zom suak hi (*Dan. 6:10*). Tua dan thunget pen nisim luheek na ah zat ding thu khat hi. Hih thungetna nam in a nuai-a kigen ding te honglak hi:

**A. Suahtakna.** Daniel in Zeisu' gen bangin "note in thu na nget uh ciang in inndeit sungah lut unla kong na khak khit uh ciangin, na Pa uh kiang ah ngen un" (*Matt. 6:6*) inndeit' tung ah kah hi. Daniel' thunget pen khat guak hi-in "kilang lo" mun hi (*Matt. 6:6*), Pasion bek in a thei ding mun hi. Mi' zaak ding-a thunget pen ei le ei kisialhna suak thei hi. Asuuk zaw ah Topa tawh kimuhna suaklo-in kisialhna suak thei hi. Kammal hoihte tawh dangnal tak-a thu'ngette pen midangte paakta mahmah dingin Pasion kiang tung neilo ding hi.

**B. Kibukna.** Daniel in thungen dingin hun khen hi. Inndeit tung pan inn khum ah om in gam dai hi. Thunget cih zong mite kilehle theihna, gam lum cih khawng omlohna mun ah nget huai hi. Tua dan munte pen leitung thu in hong kaih theihna mun hilo in kibuk theih gam daihna mun hi.

**C. Kisek ding.** Daniel in nisim thum vei thungen dingin kisek hi: ni khat nasep kipatma zing tawh hun, na seplai sun hun-in khat vei, nikhat nasep manin lupding ciangin thu ngen hi. Daneil in hih bangin thunget kisek hi. Thunget cih zong nisim-a anneck, na sem, mi tawh kimuh dante bangin kisek ding thu hi.

**D. Kiniamkhatna.** Lai Siangtho in thunget ciang-a i omdan ding tampi a gen zongin (ban zaak, lu kuun, cihte) a kideih pen bel khuk din a thunget hi. Tua in kiniamkhatna lak hi. Topa mai-ah kuun cih pen i taaklohna i zahtaak a: i ki-apna lahkhiat na hi.

**E. Lametna.** Daniel nisim thum vei thunget pen Jerusalem biakinn-a gam bup ai taang- a gan' gawh biakpiak hun tawh kituak-a thu a nget hi (*I Khang. 23:30, 31*). Babylon ah bel Daniel in Jerusalem biakinn omna ni tumna lam ah nga hi. Jerusalem biakinn omna ni tumna lam ah nga hi.

Jerusalem biakinn a kihon lai-in Solomon in Israelte Jerusalem biakinn a luut theih ding saltaan' hun ading zong thu ngetsak khol hi (*1 Kum. 8:47-49*). Saltaan' hun-a Jerusalem biakinn lam nga-in thungetna en saltaante hih leitung a Jerusalem tun kik ding lametna alak hi-in vantung a Jerusalem thak zong lametna hi.

## **Khen III: Nuntakna-ah Zatpah Ding**

**Siate' ading:** Anuai-a thungetna a nei thei ding gamtat ding thute gen pih in. Hong pai ding nipi kaal sung in thu kiseksiak in. Mai Sabbath ciang in a upna uh a khan' lam le Zeisu tawh a kinai sawk nate a gen ding-in kiging sak in.

**Gamtat ding 1: Tuamdiak thungetna:** An neek ma thunget detdan te pen a ngei'na dan in hong suak thei-a khat veivei teh thunget ding peuh kimang ngilh thei hi.

1. An neek ding ciangin thu ngetna ah Pasion' thupha angen dingin a tuam diak in thunget pat sawm in.
2. An neek ding ciang-a thu na nget taangin Late bu sung a thunget nate sung khawng zangh in.

**Gamtat ding 2: Lungdam' koh thungetna:**

1. Pasion kiang ah thu na nget ciangin a huam lungdam koh peel inla na lungdamna thu a hangte gen ciatciat in.
2. Zing na thawh ciangin na nuntak lai man'n, Kha lam ah hong khanglo sak ahih manin Pasion kiang lungdam ko in.
3. Na ihmud ding ciangin ni khat sung in Pasion' om pihnate lung dam ko in.

**Gamtat ding 3: Lamet thungetna:**

1. "Topa aw, hongpai ta in!" (*1 Cor. 16:22*) cih Khristian masate kimuh ciang-a a kamzat uh *Mara' na' tha* ngaihsun in.
2. Thu na nget ciangin Zeisu nihveina hong pai kik ding thu ngaih sut in nei in. Topa a hong pai kik dingin ngen in.

**Gamtat ding 4: Gamdaih mun tuam:**

1. Na inn ah thungetna khan ding tuam koih in.
2. Gamdai-in lung ngaih hithiat theih ding mun tuam khat seh in.

**Gamtat ding 5: Kiniamkhiat ding hun (*Kah. 3:29 simin*):**

1. Thu na nget ciangin khuk din sa-in thu nget ding kisek in.
2. Pasion lo-in kha tha na neihloh lam ngaihsun in. Ama kha tawh kidim in nuntak zia thak tawh na om theih nadingin Amah kiang ah thuum in.